



Jumat, 03 Pebruari 2023
Ogen : Hosea 5:8-15



Itindih dingen Remuk



Enggo ka ndabuh, itindih tangga ka." Kata enda mekatep ipake guna nuriken kinisuin si ertambah-tambah. Itindih e mesui, sedak, la bebas ras sidebanna. Ogenta wari enda nuriken maka nembeh ate Dibata man bangsa Israel erkiteken ipetetapna ukurna ngayak-ngayak si sia-sia. Perayakenna lanai man Dibata. Irehken Dibata pinakit ku bas kegeluhenna. Ipindona penampat man Asyur e me raja si mbelin, tapi labo ngasup nambari pinakitna. La terjeng si e itadingken Dibata ia, seh maka ise pe lanai ngasup mulahisa. Tujun Dibata erbahan si enda kerina e me ayat 15 " Kutadingken bangsaKu seh cukup kiniseranna erkiteken dosa-dosana maka reh ia ndarami Aku. Banci jadi i bas kiniseranna icubakenna njumpai Aku."

Kerina si ibahan Dibata lit tujunna guna ngerehken kiniulin. Keleng ate Dibata mbelin kal ku bas kegeluhen bangsaNa. La atena lalap bangsaNa nilah, papak bas IA nari. Aminna pe iberekenNa ukumen jadi persinget man bangsaNa guna mulihken kempakSa.

Jujur, i bas paksa itindih seh remuk e seh cedana, latih dinggen lanai tempa lit si mehulina. Itindih pe enggo mesui tambahi ka remuk me enggo seh kal cedana. Bas si ceda e Dibata tetap mperdiateken kalak si ikelengina.

Senina Moria, pernah nge sigejapken nanamna itindih dinggen remuk? Mari erlebuh man Dibata, jumpai IA maka jumpa kita. Baba kerina penggejapen e dalanta reh deherna ras IA. Janah e me si itimaken Dibata bas kita nari. Keleng ateNa kam ras aku, janah la atena kita bene bas kerina perbeben sialaken kita.